

T 2260.28/2127.4(1)

CHINESE - JAPANESE LIBRARY
HARVARD - YENCHING INSTITUTE
AT HARVARD UNIVERSITY
OCT 31 1940

此山人物博厚
天地之大人為貴人之所以為人者以其有四端之德其
五倫之義人則本貴也苟小而不夫為一計一德之士故
有夫貴者物類有辨于生或如僅口欲食而已矣男女而
已矣然則貴者動而已矣豈何而不念生于天地間哉孔子
曰十室之邑必有忠信如夫之生人未嘗不有厚望焉
今夫貴者苟有材實有大小苟亦德焉亦非聖賢已
矣之也然則夫之貴者豈非人君之得失至大乎
和氣之天下才邪貴者德也其於詩經之有德有言
而文獻之也司馬遷作史記而

崑山人物傳序



天地之大人為貴人之所以為人者以其有四端之德具五倫之美大則參贊化育小亦不失為一材一德之士故能表異于物類有稗于生成如僅曰飲食而已矣男女而已矣知覺運動而已矣幾何而不虛生于天地間哉孔子曰十室之邑必有忠信是知天之生人未嘗不有厚望焉也然而氣稟有清濁材質有大小苟求備焉亦非聖賢忠恕之道矣古者史載筆士載言惟記人君之得失至太采采風乃及于邦國亦僅取其歌詩以見夫風俗之貞淫情性之淳澆而已未嘗每人而記載之也司馬遷作史記而

傳之名立焉班固因之以為史法然其人必有關於家國之大其書亦為一代厚興盛衰之所係非僅為一鄉一邑之紀而已也若夫一鄉一邑之紀其作更有難焉者地近而勢迫褒易而貶難繁稱既虞其濫及審擇又慮其多遺況乎所徵信者諛墓之文愛憎之口一人而或異其詞一事而或訛其實文采不具流傳不遠尚其幸也文采足而流傳遠焉是非邪正顛倒互淆其為害也可勝道哉然則何如而後可以作乎亦視乎作者之人而已必也其心公正而無私其實詳審而不謬又有紀載之筆足以達之而後可以作作而垂之後世賢者見而加勉不肖者讀而知

懼于人心世道之際庶有所補焉玉峯葉子慮澄富于文所有著有崑山人物傳介朱子慎幾而請益于余余接其人恂恂然謙退而不敢自足讀其書縷縷焉詳審而未嘗輕信文采具矣心術純矣以是而作焉世道人心之幸而非玉峰一邑之光也余耄矣見聞不足以資其益齒牙不足以為君榮姑舉夫天地生人之故與無求備之心以告焉庶幾其有當乎康熙五十六年三月朔吳門八十有廢叟易亭楊无咎撰

人者地之靈凡宇宙疆土風物肇自古昔者雖年變世異大畧從同惟人不然一代之挺生一時之濡染同地者異

其人同人者異其品昔人云世閱人而成世惟世殊世故人亦殊人也然則人物之于地志其尤論世者之權衡歟近代寰宇記統志諸書其體製宏博者率皆肉食諸公餽釘抄撮借耗內府之餐錢而郡縣志籍之專成者守土之司又往往倉卒仰成于捉刀噉名之游士于是苦六合之難賦則葫蘆以舊樣相矜偶轍迹之乍經斯采聽以風聞為據文獻蔑矣將何徵焉思欲規方數百里上下數十年持公平審慎之心彙為一帙以土著之人志所見所聞所傳聞之人之事自非篤實君子烏睹勝任愉快者乎崑山葉石農先生慮其邑志之久虛也網羅本朝賢哲作為續

人物傳七卷介尹思俞子惠書天雄具言所以述作之意謂于顯者備紀其事功間及奏議于隱者述其篇章高人畸士留意二氏者禪語真訣亦附入焉而勝朝故老又皆在所不遺殆綦詳矣至于節婦才女及先生家乘則尚闕如蓋一以明慎重一以杜偏私也噫嘻此其用心豈第與葫蘆之依樣采聽之聞風不同日而語也耶先生素精于學易癸巳季夏偕尹思上公車見過旅寓因獲窺所著易故尋索象數縱橫鉤貫湛深浩淼使人怖河漢之無極而鄙著彖義一編亦頗蒙贊先生首肯許步後塵今雖未得睹先生人物傳全書然以彼方此固知先生之作之有裨

世教而為考據者所必資也他日南歸儀訪戴之舟拂席
 攤几出其書琅琅雜誦汝南先賢襄陽耆舊諸篇彷彿再
 見于以欽地靈而仰人傑豈非知人論世傳信不朽之盛
 事乎己亥素秋余方卧病漳干尹思將薄游崑山會先生
 再書督序因力疾揮數言附寄用明嚮往極知荒陋無以
 塞責稍俟更受全書當益抽思聘詞為先生任皇甫之責
 則斯篇者先生其姑為我藏拙勿以示人可乎康熙五十
 八年七月既望孝水龔纓撰

崑山人物傳目錄

卷一

歸昌世

沈弘先

顧錫疇

王志長

胡甲桂

夏萬亨

顧孝宏

顧咸正子天遠天遴

陸安吉

張魯傳

朱日燦

魏文心

鮑觀曹夢元陳奇謨

陳岳如

張丙

朱天麟

支萬春
張紀弟緄

方國祥
陳蘭徵

卷二

陸世鏊族弟世鑰
顧其康
朱尚
張安淳
諸永明
方南龍
葛雲芝葉弘儒顧冲

王掄春
何永燁
顧炎武
張立平弟立廉
奚濤
金遜李子紫朱述善朱瑞
葛 驥

卷三

陶甄
朱正純
莊雅

諸士儼
徐玄敷

朱顯宗

何爾晉弟爾昇

徐開禧

孫元凱

周維瑋

徐開禕

徐開遠

周鏊吳玄冲

丘萬孩
子鍾仁

王 偲

王 榮

周家玉張乘張雋

葛 寓

張維芑王鏞周楫宋汶

龔賢何法周如凱浦鷗

顧錫璇

鄭伯昌子起濂

卷四

呼 谷

歸 莊

吳 爻

鍾 曉

梁 逸

卷五

何鄴侯

李可沂

盛符升

王志守弟浦珍

徐開任

夏玄圭

朱高葛盞

張 圻

顧升輔楊起虬歸子裕

李稷臣

夏 均

朱良王立德蘇起鳳

顧班爵

徐履忱

陳祈年

張立昌

徐與喬

柴永清

潘 澂

何執善朱諶

張守禮鄭燾高馬

邢友鄴

何陸愷

朱晨張對揚

龔齊物

周同谷

朱翼垣

呂天裕

王成周

卷六

張恕

朱端士

葛懷從弟雲薜

戴虞皋

王洄

陳仲達

孫勝鼎

朱名佐

陳留

許言

顧檝

顧紆

徐乾學弟東義元文

朱肅

王晨

盛傳敏

陳日涖子榮棟

張聞儒

卷七

孫灝如

徐筠

周拱潞

王朱玉

周耀何弘祚

顧仁隆

鄭儒

朱謙

夏乾御

朱弘詒

徐杏輔

李宗灝

胡溶時

袁列星

顧松

葉澧

晉何機

顧仁珪

唐坦唐象鈞

周渭

杜鴻

劉崿

崑山人物傳卷之一

歸昌世



歸昌世字文休號假菴祖太僕丞熙甫先生有光父叔永
 子駿公甫就傅能詩萬曆二十一年補諸生與嘉定李流
 芳同里王志堅號三才子李王相次取科第公數踏省門
 艱于一遇濶疏落拓不事生產日高醉卧憂金待炊配秦
 典衣易粟不使公知公亦竟不知也中年放意為詩阮窮
 連蹇思慕酣醉無聊不平可喜可愕必于詩焉發之崇禎
 八年謝舉業益細于詩律和陶諸篇為新安程嘉燧所稱

今錄七章云宇宙何茫茫起滅同一塵胡為一日間各營
百年身華堂與崇丘去疏來者親我廬非我有四顧誰為
鄰有如遠行客當夕已戒晨有懷不勝嗟舉目皆勞人清
溪直村塢修竹帶鄰曲花明戶未開風暖睡初足道侶兩
三人開樽傍棋局永夜雜笑言留賓方滅燭柝響間疏鐘
羣鳥啼朝旭晨朝理輕策日莫稅歸鞅行行林水間脩然
濠濮想時見行路人芒芒將焉往不如播種者晴雨候消
長野舟橫可度不復愁河廣田父為我言耜耨成鹵莽秋
深霜露繁高原榆柳稀征途戒舟車鴻雁天邊歸徘徊岐
路旁薄寒吹我衣悠悠自世路幽獨那可違束髮萬里志

終焉老一經夕秀復朝華孺子多早成老少不相及時事
亦變更隱几靜焚香和墨書黃庭草莽無遠圖不寐晨雞
鳴兵食仰東西愴然傷我情春半暖初回疏雨兼和風新
晴臨曉江萬象一鏡中策杖訪僧寮披榛小徑通梵音令
人靜世事皆楚弓雖有鑑物智不易偽與真雖有轉世權
不返澆與淳宇宙窮萬道日月仍長新四皓乃翼漢三戶
終亡秦賢聖遠御天同作空中塵顧彼溪上農耰耨良已
勤酌酒更相呼自與漁樵親前有車馬客停驂來問津世
路多羊腸忼慨一沾巾長吁歸去來低徊愧斯人復工書
法小楷行草直逼晉唐兼善畫竹酒酣後槎牙芒角奮臂

為風枝雪榦攄寫其扶疏魁壘之致人爭攫奪藏弃比于
仲圭孟端公夸然不屑也從父季思子慕謝公車為復性
之學端坐不語終日凝然而公時游酒人淋漓跌宕倚絃
度曲曼聲長歌兩人形跡不相似顧持身律已不受緇涅
一稟太僕之舊德公亦何多讓焉邑相請綽楔署書鄭重
誣諉終弗許可謂介也已晚當國變自以家世為儒荷三
百年涵養不殊世祿歛歛泣塊然無生人之樂公三子
皆才昭殉幕府繼登死儒官僅存莊遂擗標發病乙酉九
月四日卒得年七十二

論曰萬曆間京兆僕徐允徵竄列子衿狡焉思逞公與

對簿幾不勝通邑大譁朱臬副熙洽支中丞可大諸儀
部壽賢累牘辨論學博沈應奎至以去就爭之歷趙楊
史熊四學使案始定雖一時士大夫公正發憤者多固
由公素行足取信焉至當事旌公有卻金三百迎養二
孀語此又豈晚近易能事錢虞山志公墓竟遺之公自
作年譜亦不之及何歟年譜于東林之被璫禍附載頗
詳且謂曾偕高景逸在洞庭晚食後景逸必援琴奏一
二闕尤喜屈原問渡操其音淒切羽聲也今乃自沈池
中似屬讖兆然公雖諸生而與東林諸老臭味相同休
戚相關其器局居何等哉

陸安吉

陸安吉字叔時別號繼雲性孝友竭力事親或暮歸親已就枕必屏氣立寢外聞欠呵則就問訊親命退始即寧元太初元吉早世珍襲遺編每訓課諸子泣下沾襟萬曆間歲大侵穀踊族子弟搶攘富宗門丐舉火富出粟給諸寒族雅重公踵門餽堅卻不受而遇筮獨顛連者百方簡括賑之賦租時佃告艱苦即不驗率論折券貫其貸有慕公來訪者盤桓累日恣所欲談別去不復憶姓氏蓋胸次磊落無留滯如此長子世璠登賢書誡之云吾但願汝常體認孝廉兩字耳又云為子守身為臣致身忠孝俱從身起

又云敬則神明有主恕則方寸自平郡守陳洪謚司李倪長珩兩舉公鄉飲大賓且列狀上當事聞諸朝徵授光祿寺署正國變後杜門晦迹膚髮無損顧黯然見顏色間為吟咏輒焚弃僅存五絕句感懷云百無一字百無心每到春來暗溼襟野老莫談天寶事畏人白髮廢纓簪英雄有恨不爭多試問千秋事幾何留得醉鄉天地在荷鉏歸去緝漁叢慰盜云寒窗十載費經營謾說文章誤此生明道自來真學問讀書原不為功名抱膝悲歌一室中此身只合五湖東兒曹縱有飢寒事莫做文章學送窮身經多難是餘生未了人間事輕老去好留真面目漫將些个逐

浮名已丑二月十九日卒得年八十三金孝章俊明輩私謚為孝靖先生

論曰公方少壯時負米遠道夜歸烈風雷雨魍兩當立而嘯公叱云爾仇然何人者罔兩伏不見渡白田湖磷火萬炬宵現舟陷澤中不得前公叱舟子云左當得路磷隨指分道舟過復合又渡樊颺作楫傾墮溺水浪擁五里許氣垂絕忽若有憑而浮者觸菱滕躍出視所憑即墮楫也屢瀕危皆得亡恙固天留碩果以顯其志節耶聞公生平能持正而無爭色能泛愛而不亂羣故沒之日里巷悲悼掩泣蓋感乎人者深矣

沈弘先

沈弘先字開之別名石一字石公其先嘉定江東鄉人以避倭亂徙居崑而公與子章甫徵憲並補嘉定諸生不忘本也公落落直行胸臆每伸紙疾書欹崎歷落不顧世眼嘗嘖蹙向人云湯宣城故是學堂語耳聞者訝之卒以此不能取信世榮寵公亦自厭去間為五七言詩杼寫所自得旁及摹畫江山草樹煙雲人物筆墨閒放識者跡其用意荆關而下莫能儔也公既羞俯仰隨俗苟合取名亦未嘗故立崖岸率意臧否其接待一本至誠事親孝處友義于財利澹如解紛行惠不屑屑與人言人亦難以殫悉至其

崑山人物傳
引掖後學嘉獎善類尤孜孜日不及薰其德者無論雅俗
賢下悉敬愛之縉紳大家于晨花夕月置酒招酌每聽公
履聲為重前後吏茲土者多造廬請如鄉飲讀法之類弗
峻拒焉所居古屋數椽老樹一株柯枝曼雲每當綠天陰
幌黃葉滿庭公蒼顏素髮布書卷婆娑其下或琅琅誦金
剛經賓至則劇談古今成敗事間出山蔬濁醪佐之攜稚
孫弄之自號獨樹老夫用杜語也乙酉之變公出走迎薰
門去門不百步為兵所及揮刃向公徵憲乞代乃舍之而
徵憲被殺公負傷走更與兵遇被數創指腕俱斷不死兵
去後昇歸療治數月始得瘥然痛念徵憲居一年鬱鬱而

卒徵憲生平亦長厚未舉子日豐時謀置妾有以訟窘鬻
女者妣引見既售尋知其故惻然云彼有急是不得已我
得已顧乘人之急乎乃援授之金而還其女焉

論曰公高冠博袖儀觀儼然友陶仁節而公齒長每相
見不辭上坐竟指下坐字仁節云圭禘汝坐其剗篤如
此仁節嘗稱公通不隨時貞不絕物與歸假菴唱和為
一時兩高士乃末年所遭之況亦約畧相等豈造物忌
盈盛名之難居更甚于富貴利達耶今沈氏在崑者不
絕如綫後生小子僅知假菴鮮知有公矣朱文雪鴻母
公之女也屢詔其子作公行畧終不果雪鴻詎廢母命

者遺事寥落無從措筆耳嗚呼所謂名者未滿百年遂至于此然則造物又何庸忌耶悲夫

張魯傳

張魯傳字宗在號東樂萬曆二十四年補諸生三十九年試第一授饒崇禎十年里選十一年授上海訓導十三年巡按御史任濬疏薦^遷順天灤縣知縣十五年城守有功明年調贛州之雩都會龍泉令蕭世澤不能禦流寇而遁公伺隙至龍泉集紳民諭以大義撫循防禦得復完大吏遂委公兼署龍泉乙酉陞廣西新寧州知州丁亥五月薨髮牌下公杖殺其使誓以身殉七月^遷祠祭司員外郎戊

子改補主客司尋陞儀制司郎中卒贈行太僕卿

論曰張氏顯自滇臬憲臣公之祖也父志美負重望公兄弟復齊名黌序昌樂令魯得閩藩魯唯皆成進士公不得科第微員漸進于流離播遷之餘所遭獨苦矣乃盡瘁儀曹遺命寔粵魂依日月不須桑梓斯其志節亦無忝家聲者哉相傳公之孫崑字眉山累叙戰功官至大僚吳三桂誘而殺之訃聞謚忠武何諸家紀述竟莫之及也

顧錫疇

顧錫疇字九疇號瑞屏曾祖舜祥夢羽蘄州同知祖懋善

允元甌寧知縣父禮初天叙元城知縣公幼以孝聞萬曆二十七年補郡諸生四十三年入北雍御史劉元光復進言下獄公上書大學士方從哲慷慨規切四十六年舉京兆第二明年成進士選翰林院庶吉士天啟元年假歸四年授檢討時魏奄方熾公典福建試闈題以無父無君斥之發策首以人之貴賤為問而謂色授氣使者甚賤不可昵程策復有朱紫雜沓于貂璫金組艷奕于婦寺等語會魏廣微以請託不從顧秉謙以聯宗不應傳成其罪遂與江西主考丁乾學廣東主考陳子壯同被譴五年調外六年削籍崇禎初召用陞贊善歷諭德遷國子監祭酒奏復

積分舊法得閻爾梅沈綵陶如鼎等皆文行有聲又釐正典制有從祀議謂十哲中宜進有若南宮适而降予求先儒中宜進諸葛亮狄仁傑范仲淹及始議追封聖裔之梅福近儒中宜進呂柟羅欽順高攀龍顧憲成馮從吾聞者避之已而請告歸奉養元城公于鄧尉山復因先世都事澡所築馬鞍山之東岩亭下搜石濬壑名曰樂彼之園供元城游賞馬翰林故事在籍亦得轉遷升詹事府少詹事赴又遷詹事時流寇猖獗元城公謂非臣子晏安之日促令入都陞見上臨清德州練兵䟽升禮部左侍郎尋署尚書事會武陵楊嗣昌奪情為大司馬論流寇宜撫不宜勦

引孟子樂天者保天下善戰者服上刑二語公抗言此諸
侯交鄰事稱引不倫嗣昌語塞及嗣昌再以母服奪情入
相何楷黃道周等連疏攻擊召對平臺公班最上與廷臣
爭持正論嗣昌遂欲撫事罷公矣王都尉者穆宗壻也熹
宗時忤逆奄稱疆直時戚畹皆助餉王貧獨不及額應下
兵部議處而移諸禮部以中公公果從輕擬奉嚴旨削奪
十五年起南京禮部左侍郎管右侍郎事弘光時進尚書
首疏請遣使北行祭告陵園奠安帝后梓宮訪求東宮二
王的耗又請復建文景泰年號諡讓皇帝廟號惠宗景皇
帝廟號代宗又請追諡故輔臣劉一燝文端賀逢聖文忠

又請祠死難臣同里隨州知州王燾山西巡撫蔡懋德顏
曰雙忠再請諡燾忠愍懋德忠襄又請諡故大學士文震
孟文肅南京兵部尚書呂維祺忠節詹事府少詹事贈禮
部侍郎姚希孟文毅禮部右侍郎羅喻義文介又請諡故
督師兵部尚書贈太子少師盧象昇忠烈又請諡河南道
御史王章忠烈又請殉難諸臣范景文倪元璐李邦華孟
兆祥施邦曜劉理順馬世奇汪偉成德金鉉等十人諡廕
建祠又請諡開國勲臣傅友德武靖馮勝武壯疏入皆報
可輿情大快而以請削故府輔溫體仁諡與政府忤請祀海
歸復命時值吳中薦饑請寬民力疏列五款今錄其有關

崑邑者旱區折色云臣崑人也崑有十三旱區地形高仰
土性磽确萬曆六年御史林應訓親臨秤土比他區獨輕
故秋收獨薄揆之事理應與嘉定同例必當全折又清荒
熟云崑田雖有定額而戶無定在荒戶可以避徭役緩徵
比則熟田悉隱于荒區區書班總受賄移換致熟區之獨
困而荒田在熟區者其困彌甚請敕撫按行查有隱占詭
寄者寘諸法此疏雖未行而深中積弊非用心國計者不
能道也隨乞終養以登極恩加太子太保晉勲階上柱國
光祿大夫覃封三代廕一子入監讀書亡何御史張孫振
劾奏勒令致仕乙酉夏南都不守元城公絕粒七日死公

遵遺命歛畢即奔謁魯藩于杭未幾魯藩出走公由海道
趨閩思文已建號福州進公建極殿大學士以守制辭不
拜丙戌加太子太師禮兵二部尚書兼都察院左都御史
賜上方劍便宜行事公仍固讓屢請聯絡江浙自效出駐
溫州江心寺有總兵賀君堯聖兆者縱卒殺掠公劾褫其
職賀蓄憾五月十六之夜率部眾圍寺排牆入公遂遇害
尸投江中溫人覓之三日乃得殮

論曰公性謙下恂恂若處子而臨事堅守屹不可動遭
逢世變職非守土心不忘君流離顛沛其迹畧似文山
溫人故勒公碑于信國之祠顧不死燕市而死叛帥乎

人徒信其忠不能表其烈尤可痛也或謂公前生係天台老僧路逢巨蛇以杖擊殺之賀即蛇後身是無稽不足信適藉後來奸慝口無所顧忌耳賀至舟山見戮于黃斌卿斐全家無噍類非殺忠現報耶公所編正史約風行海內而制藝有文滙約言諸刻亦膾炙人口鄭鄴云能以淺詞取深致能以平調發異解控想雲霞之上轉機毫杪之端動如飛雲駐空清若寒潭浸月筆墨互用心手俱靈邇年以來一人而已

朱日爍

朱日爍字靜之號雪岩其先自大梁徙崑山祖黔臬副鴻

甫熙洽父封中順左元 臬副嘗買舍旁廢宅中順舉倍稱之息斥而新之副使懸車歸老華堂燕寢俯仰極樂中順復娛侍百方山川登涉歲時燕賞畫船游屐周流數百里間厨傳供帳皆取給于稱貸城南數頃盡折入子錢家不使副使知副使沒中順以其田廬按籍與債主一夕而盡歲大祲瓶無儲粟撫公笑曰此萬金產也公少從姊壻王提學志堅游學綜經史文不苟作萬曆廿七年補諸生四十年領鄉薦中順猶及見焉公六上公車不第選懷遠縣教諭用薦入為國博進監丞匝月以城守需人推擇授添注工部分守永定門門首當敵衝控弦遊奕不絕中貴

立燈竿桂敵樓劇戲如小兒巡視大臣唯唯公正色折之
不少避解嚴實授營繕司主事視西城河土管試驗廳監
修閱武門馬棚所至與中貴交踈算金錢估工役磨牙鑿
產歧口沓舌公洗手受事勾稽彈駁中貴咸目詛之未有
以中也遷員外郎督臨清磚廠瀕行敵騎大至太監高起
潛檄道臣高捷撤河西浮橋濟師河西民擁眾不聽撤捷
逃匿公馳至河西反覆勸諭民謹應師得濟敵騎解去亡
何公坐馬棚舊事下獄閱十九月得白然竟用是罷家居
數椽不蔽風雨宴如也嘗語人云有謂後世賢師我儉我
并無儉可師或師我讀書行意而已聖安立復職疏請購

遺書濬劉河及別治官吏徵解侵漁時論避之慈禧宮成
升福建右參政管延平府事未行而國變杜門三載卧病
三載辛卯二月卒年六十八

論曰公天性孝友內外無間言居官廉辨一二蒼頭皆
副使所遺其與人不翁翁熱亦無崖岸蘄絕之行也晚
年棲心宗鏡凡聲色玩好視若浮雲獨于清明日輒北
向泣云乞兒馬醫瀝血漬地十二陵誰奠一盂麥飯耶
遂忽忽無生人之樂錢虞山銘公墓云丹樓如霞兮衛
河湯湯清嘯不遐兮尺組猶長衣冠月出兮寢園薦荒
歿而猶視兮烟烟北邙眇然書生兮與國存亡可謂深

知公者矣

王志長

王志長字平仲號輞水質性嚴重不露丰采六歲隨父任信安一日移橘植內齋公布袍侍立縣役不知為貴人子拾遺橘致公公弗顧既就外傳讀書一二過輒上口髮未燥善屬文矣萬曆二十八年就童子試太倉州守豫章丁永祚以其卷呈王文肅錫爵歎為美才是歲補州諸生雖早負文名與復社而顛倒黷序者十一年浮沈成均者十九年于制策業烹煉良苦嘗云世之為文推禪于新故之交蕭然欲盡者本喪而力弱也若夫理學性命之言久而

愈瑩淡而愈旨入而愈深磨而愈銳非旋轉新故可得靡沒是松柏之有心竹箭之有筠也又云文以神悟為主不可恃口耳筆舌之用揜我神明故嘗累日月不操管伸紙而裏所獨得無日不往來遷變若水之流若雲之生日進而未有已也崇禎三年領鄉薦方拆卷主司姜曰廣見公名驚喜十三年會試中乙榜奉特旨與甲榜同授官公感夢歸遂絕意謁選自題其文曰晚香集篤志經學以易起家兼精三禮毛詩謂周禮儀禮文義古奧真聖人之書若禮記僅堪為二禮疏解耳乃刪二禮注疏采漢以來諸儒說翼之間附以己意名曰注疏刪翼又謂朱子所注三百

篇動與古注相反而毛鄭去古未遠豈可盡非乃以毛鄭
為主凡說詩諸家搜羅殆徧稿四易焉餘所纂集有學史
續表異錄賢奕瑣詞感應篇廣續傳生平敦儉尚禮恥干
謁所交多名公巨卿未嘗輕發一札以先之當兄任楚學
時有僧持千金致楚人意屬居間者公勃然變色云吾兄
廉吾豈欲以貧相累耶又少好佛皈依雲棲蓮大師晚復
依靈巖繼公手寫華嚴送常住靈巖為槩菴和上得法處
槩菴者即闡中識公之熊給諫開元也壬寅公卒
論曰公與提學聞修志堅鄉貢與游志慶皆杭州守止
之臨亨子也一鳳三雛之稱震于吳郡迨兄弟凋謝公

獨優游林下者幾二十年焉聞公嘗解橐以葬族母之
守節者道旁有敗冢夸于行路為封而樹之與人交涇
渭了然臧否不出口積行若此徒求公于文學抑未已
鄉貢當年屢置酒高會羣賢畢至公咳息相聞斂足不
入語云仁者靜又云仁者壽惟靜故壽公之謂矣

魏文心

魏文心字友繩又字子玄號嚴菴父亞夫大昌出自溫甫
希直為恭簡校嗣孫定甫紀嗣子公至性過人事繼母杜
曲盡孝道友愛諸昆讓嗣讓產皆人所難萬曆二十八年
補諸生申文定時行見其文輒喜以女孫字之而善自韜

晦天啟四年入南雍凡二十載人不知名崇禎十五年領鄉薦一上公車不第即退隱足不入城市躬畊自食著蓑笠操舟唱吳歌問人云我竟無異農人耶答云無異矣則喜或云猶有似士人者則大愧自訟不已戊戌卒年七十三屬纊之夕不及家事惟以恪遵祖訓讀書積德為後人最弟軒字子昂復社眉目後亦棄儒潛隱改名中權號中菴自題小像云爾貌癯然而骨則勁爾足眊然而神則靜爾卻名謝利忍辱堅貞豈是李下之雌守抑或爰上之肥遯詩云戰戰兢兢臨深履薄更贈爾書紳而永賡

論曰公既非功名之士何以年將杖鄉猶應省試獨不

肯再赴春官耶尚友者宜論其世矣相傳公配申氏卒申之族子有新登甲科而來弔者閉戶拒之申不得已焚帛于田壠間而去此雖賢者已甚之行然其故亦可思也

胡甲桂

胡甲桂字秋卿號石遠先世新安人遷居崑山者自祥始祥生紹紹生惠惠生珙珙生承憲承憲生嘉魚嘉魚生公幼與顧宗伯同塾有相者過之云二子並當以名節顯年十七邑令樊孝介玉衡見公文深器之萬曆三十一年補諸生直指祁忠敏彪佳有吳中第一流之目公授徒立教

先德行後文藝尤善論說書義多闡發如柴林徵屑壁顧
選篆緗徐仲舒開遠俱入室弟子次第獲雋去而公不利
闈試崇禎十二年僅中副榜貢入太學十五年選南昌府
通判南昌固省會事煩賦重通判雖閒秩兩臺耳公名輒
委署屬篆公愛民潔己持大體務為休息抗言所屬利弊
乞上臺興革以拯民困未幾流賊陷漢南浮尸蔽江袁吉
相繼淪沒公適攝郡調措兵食竭力捍禦得亡恙乙酉升
永州府同知道梗改廣信十月六日入署城中羸兵僅千
人糧盡援絕惟引大義感勵將士咸涕泣不忍散去丙戌
黃忠烈道周募兵至問公何恃能守此公對云誓與城同

殉辦一死報國耳忠烈歎息云吾亦同此志也先是崑山
城陷公弟玄茂季桂子幼淵泓時從子霖汝潤時皆被難
一夕公假寐譙樓中夢泓時血流徧體前告云兒死矣詰
朝語夢于外舅徐寅屬以幼子溶時俾挈避深山中獨嬰
城固守四月二十四日金聲桓督兵攻城城潰公掣佩刀
欲自刎猝被執勸之降不可幽別所遂自經死年六十四
其家留廣信者六月偵訪公耗不獲而歸後有毛姓述之
蓋與公同繫而逸者也

論曰四郊多壘取高第為大官或降或竄者比比也公
一明經郡丞使其心少有毫髮之動于中惟有一去耳

顧從容賦詩訣別妻子坐此旦夕必破之孤城何為哉
即無毛姓言終不得公死所公之捐軀報國固可信矣
前輩作公傳者五人澹菴大蒙愚谷息關雖詳盡惟孝^朱
定見及此

鮑觀

鮑觀字我生一字彥卿曾問藝于張孝敏為人坦然平易
毀譽不能動路見遺物守竟日俟覓者歸之萬曆三十一年
與顧仲從同應偕補諸生同應結文社從其堂名遺清
公為領袖其後仕者則張昌樂魯得方伯魯唯顧延安咸
正錢塘咸建宗伯錫疇朱參政日燦胡廣信甲桂先族曾

祖水部先曾王父奉常未仕者則顧幼疏咸受張士登廷
對晉叔廷楫錢汝洽承熙適之時用王敬夫汝懋開美約
爾標枝幼實元芳戴同得文先歸文休昌世金伯闇元燿
嚴公調廷憲董元敬廷縉凡二十五人一時社約之嚴社
藝之盛甲于吳中焉公既久浮沈黌校嘗遺文休竹皮冠
系一絕云進賢人易我偏難轉眼青雲入夢看不信神仙
也無分一冠取次為君彈蓋感慨係之矣己丑公年七十
九先奉常貽公詩有叔牙肝胆今誰似明遠文章老更强
之句

曹夢元

曹夢元字元徵號澹菴曾祖君明治道習高堂生言學者
宗之稱葛里先生祖懋功昌期困于徭弗竟學父衡叔秉
銓復有聲膠序公益熾其業萬曆四十六年補諸生嘗遊
西湖獲遺珠一囊求其人歸焉問姓名不告也晚歲代友
償逋中產如滌矣批閱史記以詳明稱又搜訪殉難者為
完節錄核實直書不加文飾男子曰死守死孝死義死任
凡四卷婦女曰節發幼烈從夫偕義安節拒擄凡六卷

陳奇謨

陳奇謨字君俞一字孝若少好學至忘寢食朱文靖見公
文驚異為之延譽天啟四年補諸生聲稱籍甚陽羨當國

附麗者立致通顯介所親招之謝弗往乙酉薙髮令下棄
舉子業屏跡江鄉終其身三十年竟不薙髮嘗以事入城
有附舟者登岸去而遺其橐亟命追其人號泣返云某假
親戚金珠數十事在質庫間聞亂粥田以贖不遇仁人有
死而已再拜去晚年僦居甫里惟與方外往還雖親串罕
覩其面性愛杞菊嘗云中有至味未易領取吾得友天隨
先生于千載之上矣所著天放散老集藏于家

論曰道不拾遺近世鮮聞焉以為吾不取必有他人取
之均與遺者無預耳然而慎獨君子嚴辨義利此而可
為則攘羊攘雞亦遂為之乎若夫歸物原主較諸僅僅

不拾更有間矣或謂有隱德者其後必昌胡弗盡驗嗚呼邀福之心與嗜利之心相去不能以寸固非諸先生當日所計及也

夏萬亨

夏萬亨字元禮號葵南其先世為太常卿景生承事郎鉞鉞生景清景清生集集生從昌從昌生有璠有璠生世文世文生公少工文章有德器萬曆三十三年補諸生四十六年領鄉薦授婺源教諭躬行率士士皆悅服歲荒捐俸設糜以賑飢者全活甚眾升西平知縣時寇躡河南公治城築隄練兵保甲為禦賊計至悉而民不擾改知夏邑

寇氛猝至環夏之境郝良貴房星程繼孔等數十百若往來出沒所過郡邑多殘破獨夏邑以令賢相戒勿攻但兵頓城下公輒開門出責其為盜不義或不聽命則云寧殺我毋殺百姓賊相顧驚異連稱好官好官不殺一人而去署永城適總兵劉超叛殺巡撫王漢朝廷用故督師丁啟睿討之諸道援者數萬凡糗糧芻芻儲備之事悉公轉輸超既擒上功命公行勸農副使事仍治夏邑益悉心撫輯未幾聞北都陷慟哭云受國厚恩分當捐軀顧尚有老母在遂乞歸聖安立柄國者以公諳河南情勢強使迎太后既奉太后至南都擢江西布政使言者以為驟改按察司

僉事分巡南瑞初至給兵餉贏十之一公詰吏吏云此故事公所當有也公正色云侵奪軍資吾豈為之矧此何時耶亟召軍入盡予焉保寧王避寇南昌縱奴豪橫公答其尤橫者則聚黨持白梃噪公署南昌民詣王者萬計謂奈何殺吾夏巡道焚門入巡撫檄止之不聽公檄至始散去其得人心如此尋升按察使司兼布政司使綰郡縣七印而時事瓦解公奉母至撫州屬諸門人臨川令將返南昌金聲桓已入據矣金為左良玉部將北降者素重公治行先貽書勸達時變公不從入建昌奉益王圖恢復建昌破被執金待公有加禮欲援為大吏撫江西公堅不許乃押

赴南昌王都司嚴禁密室公絕粒數日念母在撫州冀通一信有高明者往探知亡恙而全家之在建昌者俱死公索紙筆書絕命詞匍匐望空叩首呼母者三氣咽倒地南昌士民共籲金保公金恐有變潛送于楚帥佟養甲佟慰問良久公惟求速死八月廿一日臨刑口授從者云居官兩月四代殺絕一心報國九死不屈竟傳首南昌棄尸于武昌城下

論曰公初令蕞爾孤城當鷓鴣張豨突之賊能保無恙還國家功亦偉矣其後職命稍優不幸皇輿傾敗閤門殉焉或謂公于甲申之歸堅不復出則無此酷禍然殺身

成仁又何庸為公惜乎聞公首至南昌號哭者數萬人
已而有故吏竊去束藁葬雖莫知其實情理應然也

陳崑如

陳崑如字仲方一字魯瞻其八世祖善始居崑山善生貞
介先生孟佐翊官至教授翊生鑑鑑生復吉復吉生可樂
可樂生唐贈奉直唐生王政王政生一麟一麟生公早喪
母沈幾廢學既娶陸始折節讀書父貧王母陸殮具皆出
公夫婦脩脯辟績貲萬曆三十六年補諸生四十三年領
鄉薦三上公車不第授儀真教諭真邑巨商雲集不重文
教公至勤課業獎時耄士習丕變升國博尋遷知冀州飢

則賑粟疫則施藥全活無算州多馬每歲上貢例用民解
充是役者輒破家公力請臺使易為官解又有地數頃本
非斥鹵而相沿有鹽課累民公亦請諸臺使特疏題免即
升汾州府同知以在冀時曾擒積盜之劫束鹿境者束鹿
令有移文提質旋入盜金縱去踰年歲晚賊露欲治此盜
仍向冀州關提則以前守移付束鹿對直指遂與束鹿令
同劾落職逮問檄下晉之大吏頗惋惜將畀以賑荒羨餘
四百金俾治裝公力辭蕭然就道覆按始辨擒盜者冀州
縱盜者束鹿留都建國薦補歸德府同知請告歸丙申秋
病咽丁酉正月四日卒年八十

論曰計一身之利者循例報最即稱良吏安望其盡心于格外乎公居鄉廉靜絕不知有干謁事居官乃能兩除積弊孟子曰人不為也而後可以有為信哉公塔王績水洄誌公墓云生平多喜少怒多憂少樂遇事多豫少弛待人多謙恭少倨傲年雖耄神明湛然余于公之性情見公學力以長者語吏治固優為焉矣

顧孝宏

顧孝宏字宏之號萍菴高祖舟卿濟刑科給事中曾祖子繩縱祖和甫紹夔耶縣令父宇宣同文精青囊家言公三歲失母王比長事繼母金甚孝萬曆三十六年補郡諸生

善讀書有大志外舅張山甫維申與周氏構難寄金銀器皿不下萬餘金事平歸之無分毫染指四十六年聞遼左陷歎云國家自此多故矣間於誦讀暇習弓矢究韜畧及流寇日熾則命諸子兼通孫吳法尋以里選待詔京師見紀綱隳挫作杞憂十咏一時傳誦之已而授溫之泰順訓導署邑篆時上官概追優免及契稅助餉而邑本無紳田價亦微向每橫征以當上官意公不可列邑之大小分為三等泰邑在應蠲例更為裒益之法公私兩便者條上之御史左光先善公請徧檄所屬令如議行浙之小邑得免加稅者皆公力也左愛公才特薦將蒙顯擢而南都不守

矣浙閩立君仍欲重用以親老力辭歸乙未卒長子龍媒清晏武進士授寶山守備前十載戰死上海之黃浦

論曰公與顧宗伯襁褓時同撫於五臺令震宇宗伯行八公行九雖兩族而若同胞宗伯既貴顯公貧而自好疏遠者幾三十年宗伯以為言公乃往詣宗伯為致書福建陳平陽貴州楊永嘉極諄切夫固兩得其道矣公之歸養年已六十餘父年八十餘蒼顏白髮遨遊山水公衣道人衣奉杖相隨遠近見者咸謂蓬閭中人也

張丙原

張丙原名齊一名田字幼文後以字行更字薛昌號雪節

又號鮮民父黃門棟夢孟嘗君入戶而生公早有文譽成童喪父喪葬大禮皆能自持萬曆三十六年補郡諸生已而督學知為黃門子欲改入邑庠公謝曰人情厭棄郡學郡學將無士耶某守先人遺訓知有義命願無廢法督學驚歎公秉性孤潔其不與不取斬然自盟每云丈夫生不因人熱亦不受人憐吾未能中行且為狷士因顏其齋曰又次面冷腸熱見者落落難合間遊郡國友朋置酒相邀必再請始一赴赴則未嘗不歡醉獨對俗子竟日無片言課誦之餘自歷朝正史至稗官野乘並喜涉獵又能詩賦善篆隸工丹青尤愛花竹窗前尺地多植異卉終歲布衣

蔬食欣然自適或指料成敗輒奇中既遭世變始改名丙
杜門韜晦連舉鄉飲賓力辭惟與二三故交酬唱曾和花
信詩云鳥亂魚沈並惜春詩成那得不傷神渡頭芳草明
朝客帳底梅花昨夜人只為閒愁浮綠蟻卻教清夢繞紅
塵孤懸兩處天心月照着眉尖一樣顰及時卧酒並吞花
嘗恐鶻啼促歲華好事只愁容易錯多情元屬少年誇柳
條綠暗看隋樹星斗光搖識漢槎乘興扁舟湖水濶不知
何處有天涯辛亥卒

論曰黃門三子長孟長漢扶次仲宗震封公居末單
騎走都門請父諡絕不諉卸兩兄忠孝無二理固知

其必能埋名革命也若夫吟咏傳家自新城以逮臨清
七世八人已稱僅事乃更得少謙與公兩後勁乎閱婁
上編曷勝景慕焉少謙名炳樊號歸菴沒崇禎間

顧咸正

顧咸正字端木曾祖鼎臣武英殿大學士祖履吉贈昌化
知縣父謙服馬湖同知公美丰儀長身玉立天資穎特目
下數行萬曆三十九年與弟漢石咸建幼疏咸受同補諸
生而公列郡庠崇禎六年領鄉薦十三年試禮部以條對
海運過詳覈為主司所疑置乙榜遂自號棄菴謁選得延
安府推官延故流賊發難地又連遭大荒民死徙過半公

籌料兵食有任將簡卒墾屯覈餉補伍緩調六事稱石畫
焉延人不知耕為立官莊取無主之田官自耕獲收其入
以代民租其有主而田鹵莽者教以耘耔糞溉之法田利
大興旱歲苦蝗立法驅瘞不為灾木棉蔬圃一切栽植如
江南民不飢凍以其暇巡視屯堡凡官吏能否卒伍整懈
馬力登耗及夷丁姓名部落款叛無不洞曉議勦徇賊用
反間擒其渠魁餘眾悉定十五年兩臺檄委督兵勦滅大
寇朱明才等威明赫然十六年大計推廉卓有司十人公
名第三論邊俸當不次擢用是時督臣孫傳庭徵兵及餉
將圖出關公上書數千言大意謂調兵不如練兵征餉不

如覈餉出關不如守關又云出關安危關係全秦全秦安
危關係天下督臣不能用復具揭閣臣蔣德璟請少緩師
期一意選練以守為戰德璟然公言方欲上疏爭之而督
臣敗沒闖賊入關矣十月十六日公邀總兵高傑率兵五
千并延營兵六百同守延安嚴立軍法畫地守險二十六
日賊兵二十萬直逼延安高傑以兵遁去延衛指揮李鳴
鳳開門迎賊公屢欲自裁輒有救解者十七年二月寓柳
樹店之靜因菴旋抵延川之土康山寨四月由間道赴韓
城十二月闖賊親率兵五十萬踞韓城忽潼關告急賊倉
皇拔營去乙酉正月吳三桂入關稱官兵恢復全秦韓城

人遂擁公署縣事攻殺偽縣令王業昌及其餘黨居三日
北兵入境公大駭謝縣事豫王以公殺賊有功署商維兵
備道公不受與原任副總兵孫守法謀擁故秦藩第四子
起義兵草檄文一道頗多應者及聞思文立改元隆武遂
從韓城山中微服啟行丙戌四月抵家則錢唐令咸建已
死於官鄉貢咸受亦死於鄉矣公素與嘉定侯通政峒增
兄弟善通政及子玄演玄潔皆殉節其幼子玄澗欲通款
閩海有武弁謝堯文者嘗受通政恩欣然請往顧其人疏
莽且嗜酒未揚帆為舟人所覺而公有密疏附致舟山黃
斌卿轉達思文者悉為邏卒搜獲以告提督吳勝兆勝兆

陰蓄異志秘不發丁亥勝兆謀起兵事泄詞連陳太僕子
龍子龍遁投通政弟岐曾藏吳淞江上亡何人有知者乃
轉匿公長子天達所達即岐曾壻也既而捕者迹至獲太
僕并縛天達及公次子天遴而岐曾亦自嘉定執至太僕
得間自擲水中死仍戮尸三人則以五月十三日同殺于
松江秀野橋頃之海上密疏亦發六月四日公被逮談笑
自若與邑令王鑰歡飲于西禪僧舍次日趨解江寧內院
洪承疇問云汝知史可法在乎不在乎公答云汝知洪承
疇死乎不死乎遂大罵之九月十九日臨刑賦詩云一家
何處報皇恩慘死雲間與白門又云生平慚愧文山事壽

比文山更十年蓋文山年四十七公五十七也其僕錢爾
彥終始橐餽復奉遺骸棺殮惟肅焉天達字大鴻崇禎八
年補諸生後貢入成均為人俊爽有拔俗之韻口吃不能
道說讀書則朗誦終卷無留碍工詩文尤長駢體天遴字
仲熊崇禎十年補郡諸生文才遜其兄而湛深過之時凝
神靜思肅若神明要其恂恂退讓外通而中介重然諾矜
名節兩人所同也方公在任時二子相去五千里內憂念
其父又佯笑語以慰母張夫人一日之間乍欣乍戚仲熊
婚大鴻為之破產大鴻赴秋闈中途病作而歸仲熊先在
金陵聞之泣下不止蓋天性孝友如此死時大鴻年三十

仲熊年二十七

論曰有議公者謂等死耳與其死江寧曷若死延安為
正蓋公素饒經濟欲留其身以有待未始不誤于立功
之念也顧靖難時之御史大夫景清將不得為忠臣乎
可例公矣至明經茂才非陳太僕舊交特以國家故一
時意氣之合遂與同殉焉於乎父子兄弟死者五人此
世家中所僅見惟錢唐令思文贈太僕少卿諡忠節時
有先後遂不獲均沾卹典悲夫

朱天麟

朱天麟字游初號震青世居吳江之太湖濱為農家公年

十歲隨父素菴子靜之黎里有道士陸逸菴者公之戚也
精舍幽雅公欲留讀書素菴不可攜還家越二日里人粥
薪黎里公不告于家附舟往家人跡之使歸公云吾必不
欲以農夫沒世也逸菴亦勸學甚力延名師教之歷八寒
暑學成壻于崑山沈氏萬曆四十三年以沈天英名補諸
生四十六年領鄉薦出餘姚黃忠端尊素門後復姓改名
崇禎元年登進士第授饒州府推官益藩校尉入市傷人
置諸法一郡肅然兼官攝印多惠政饒州暨樂平建昌皆
建祠時天下有雙清之目謂公及成勇也十一年薦入例
補武選司主事召對極言時政得失中綦改翰林編修與

劉宗周張緯黃道周講求理學及經世之務充日講官每
進講前夕必焚香告天祈有啓沃十七年正月遣祭淮王
至山東而京師陷一慟幾不起乙酉夏邑人為即墨之守
推公居真義塘口城潰後公自真義挈家南行浮海至閩
思文立公以少詹兼侍讀學士署國子監祭酒諸生千餘
人時廷試貢生選十二名為萃士其冠服比庶常三年後
賜同進士出身命公教習未幾公見鄭芝龍跋扈乞假往
粵而閩事敗粵中建國丁亥遣官以禮部侍郎召公公上
疏請親征毋踵轍承平坐失事幾戊子升禮部尚書尋兼
東閣大學士召入直南寧公力辭願押選土兵勤略江閩

不允公不得已詣行在會李惠國成棟請幸肇慶公扈蹕
復䟽請亟頒親征詔雖優旨見答不能行也時左都御史
袁彭年左副都御史劉湘客吏科都給事丁時魁兵科都
給金堡戶科都給蒙正發多所彈擊閣中票擬輒與不合
及堡劾陳邦傳邦傳有辯䟽公所擬又非諸臺諫意己丑
正月十三日時魁遂率臺諫十六人直入丹墀大聲疾呼
繳印于內閣公隨乞去棲遲慶遠聞何定興騰蛟湘潭陷
沒李惠國成棟兵潰溺死䟽言門戶已失堂奧宜安望奮
乾斷勿判内外文武悉擐甲將兵臣請持江南嶺南使節
揀砦兵擇土豪抽峒丁募水手自近逮遠招集四方流徙

之人訓閱以充御兵遂行途次演程子正心誠意之義進
呈賜理學名臣圖書庚寅七月召公以文淵閣大學士吏
兵二部尚書入直梧州辛卯扶病扈蹕入滇壬辰至廣南
府病劇不能前寓西版村土官儂南田紹周結屋居之八
月十八日卒遺䟽達安龍府即安隆所也賜祭十一壇贈
少保建極殿大學士謚文靖長子宿垣字日生初授大理
評事遷監察御史按黔瘴隕于道次子斗垣字月生授行
人奉命冊封鞏昌王白文選行至板橋孫可望部下張勝
犯蹕抗節死贈兵科給事中

論曰崇禎時陳舍人龍正上言輔臣不專票擬居恒則

位置六卿有事則謀定大將何至并此票擬為臺諫所
把持聖旨一不當意即追憾票擬之人耶袁彭年輩不
足責金道隱頗持士節被縉後致書定南乞葬瞿臨桂
式耜張總督同敞大義侃侃乃當時亦不能釋然于公
何耶公之去全輔臣體也而亦雅不欲票擬了事者歷
觀諸疏幾幾乎武侯出師表矣生平專志讀書行街術
間不廢吟誦好深湛之思所著七觀七聞易鼎三然皆
以僻書怪事子虛烏有詮易讀之汗漫恍惚而實以寓
其胸中所得有蒙莊之風焉

支萬春

支萬春字彙昭一字凝生其先為邑人永樂間有以出使
西洋功者賜籍行在大醫院曾祖貫祖三顧高苑訓導皆
北籍父德彝如璋歸省墓仍居崑山仕至福建都轉運使
公有至性母顧病瘵割肱顙代孝事王母白終身不衰山
趾有宅頗擅林泉亭榭之勝悉以讓弟延仲永春而自退
居老屋不數年仲產蕩盡更析與之仲沒復為撫孤恤嫠
悉力婚嫁產僅千畝而族之待舉火者十餘家也當歲大
稔米石至六七金公罄餘糧設局卜山祠減糶施濟又施
粥于陸橋村莊遠近就食者眾至鬻產以繼焉萬曆四十
三年補諸生崇禎三年試第一授餼員盛名張孝敏曾序

其行卷云孔子曰辭達而已矣此一言者古今論文之的也世人同是而莫或疑之至左氏稱文以足言而後之作
者始務藻飾竊比于左氏之義遂起詞病然而非也夫文
猶言事也敏口者能言又敏者不數言而決令人味之不
厭惟恐其盡者辭達也事有首尾躔度如根連勾萌不可
以遂言者委曲宛轉自相議論而詰其是非纒纒百千萬
言而彌條彌暢者言足也由是言之甚矣左氏之羽翼孔
子也蘇子曰行乎其所當行止乎其所不得不止如是而
後聖人之言與夫作者之事可得而知之矣予既老不能
操筆為文章而好談其事每讀春秋之錄與夫俊又一時

游戲之文其言無所不足幾于五色相宣八音叶唱而竟
其指歸猶未必達者何也意見橫生各務達意不務達題
則足言之旨實始基之故嘗與友人仲從氏竊竊辨之謂
達意足言總了題局而達者辭少足者言多則巧拙疾遲
性實限之故非特枚乘長卿不相為用也仲從曰吾蓋得
友支彙昭云因出其所著行卷若干見示媵理起伏具見
爪生髮長筋纏脈搖其詞駢聯而無傷其度不詭于則斷
斷乎辭之達而味有餘言之足而截然止也仲從曰彙昭
于世泊然無所嗜雖外物至不膠于心由此觀之彙昭之
于題深矣如是謂之辭達如是謂之足言豈顧問哉予自

少好讀司馬子長之書有長老教予曰若知其解乎其文如河漢而無極其腠理繫而不及擬議也請以與彙昭則何如雖然曹孟德上馬橫槊下馬談笑然則達與足之間必更有解矣仲從鞮然謂予弁而行之蓋一時傾倒于公之文也如此顧數奇不遇聖安立始充恩選有旨趨赴銓曹公見時事日非已絕意仕進矣鼎革後屏棄人事延高僧于城西郊園繙繹內典辛卯詔舉隱逸邑令奉撫檄造請堅卧不出卒年六十四

論曰勝國末聲氣最盛有應社有幾社有復社始分後合以網羅天下之英俊公亦其眉目也嚴毅簡重諸名

流肅然敬之相與裁量人物褒譏得失文章足以追古作議論足以衛名教幾乎東林似續而留都防亂一揭遂伏黨禍仲馭殊死定生繫獄畊巖次尾亡命宜公無用世志耳晚而逃禪披裘垂釣歟市卒吳門歟曩時聲氣消磨烏有彼夫儼附儒林而視天崩地解落落然無預吾事者何可同年語哉

方國祥

方國祥字仲旋號思矯七世祖盛王文恪所稱槐庭先生羽儀吾鄉者盛生麟贈禮部主事麟生時舉鵬歷官右春坊庶子遷南太常卿鵬生策光祿寺署丞策生世儒晉寧

州同知世儒生所生介夫士騏中江令士騏生公性至
孝父病衣不解帶者數月及卒哭泣哀毀幾不能勝後至
垂白之年念之未嘗不嗚咽也萬曆四十三年補諸生天
啟七年領鄉薦居南新瀆里非公事足不入城女兄弟有
許孫氏子者孫因寄田公戶未嫁而孫氏子亡悉歸其田
不名一錢同宗有爭嗣者為按籍定派歸所應立其守正
不阿類此三上公車不第崇禎七年選華亭教諭時夏考
功允彛陳黃門子龍以敦勵文行起里中公至深相引重
而同時博士之來雲間者有管珍楊彛楊文驄皆名賢相
與左提右挈風厲羣士若周茂源張黼施惟翰後皆為聞

人則公激賞之力居多十五年升雷白知縣縣故神電衛
地居民鬼面鳥身木食穴居然跳梁難治公至鉏豪強伸
冤抑杜吏書之弊懲皂壯之奸裁城中房號以甦民困禁
排門船埠以免鄉擾申明借支錢糧以清積案置買代馬
差田以惠里役丙戌遷肇慶府同知署廠印公封天字號
免稅粟又減米穀船稅惟以寬政矯宿弊升瓊州知府有
巨盜莫二者倚大府左右為耳目輒捕輒先逃劫掠所至
遐邇震驚公密計而直擒之嶺東千里之患平矣時中原
改步江左沸然閩粵之間自為正朔兵樞國柄移在大帥
朝廷僅奉行文書或請擢公兩廣監軍道公慨然云此豈

可為之日耶決意請告粵中有龍山者溪谷清奧水石幽
深公與二三文士盤桓其間捫蘿引葛賦詩飲酒聊以卒
歲而北望故鄉淒然有枌榆之感至辛卯始克抵家又十
年而沒

論曰卧龍山人誌公墓如此固可信者而里老訛傳公
歸時攜一敝衲密裏金珠家用饒裕也然使居官廉慎
即少有積蓄亦何病政不必辨其事之有無耳矧夫家
居十年視子姓之不能嫁娶者嫁娶之死不能棺殮者
棺殮之有宿負者代償之又大異于積而不化者乎

張紀

張紀字齊方年十六筆下滔滔便有屈注天潢之想張孝
敏稱為上流人萬曆四十四年補諸生天啓間以父烈愍
公振德死事蔭北京錦衣衛中所正千戶未補崇禎十七
年聞都城變盡質其負郭半頃褰裳犯難為秣陵游思有
以起衰振痿報稱萬一白髮青衫西風羸馬蹙躑長干道
上者久之乙酉後薙髮披緇施力蕭寺自署僧名曰昭節
更字閏生號蕤菴亦號雪頂維摩亦號香醉道人無定稱
也所著有蕤菴集江村春望云春風爛熳遶天涯曳杖江
村攬物華身在故鄉仍是客心從安處即為家貧來生計
號寒島病後居諸赴壑蛇更得幾年還健在青門長種邵

平瓜乙巳卒年六十七弟緄字稚龍號稷原隨父烈愍赴
蜀天啓元年丁大難明年與興文諸生王垣仗劍從戎團
練義勇部伍肅然斬叛招降獲偽都司趙陽趙瑞皆壯士
詳諸大吏即假以都司銜大得其用大吏叙功上聞將授
公都司簽書辭不就四年扶烈愍櫬歸里崇禎六年補郡
諸生旋遭世故棄去更名潛字寄餘號研樵生平為善惟
恐人知凡遇親友解紛直詞正色無依回徇王鄉貢蔡
梓家乘公為祭父嶽壻據司業同祖舊本正謬誤斥假借
甚多然秘不示人也所著有啓禎集庚申卒年七十八
論曰兩公員侗儻才終老遺民斯真忠臣子矣聞金吾

任俠盡費卹典帑金後至粥產營葬而茂才困守斫田
曾無微憾伯仲唱酬極墳麓之樂不逾難哉披覽遺編
足徵情事亦何庸拘以詩家格調也

陳蘭徵

陳蘭徵字猗之萬曆四十六年補諸生崇禎十三年謝去
布袍皂帽蒼顏修髯終日無疾言愠色即甚喜亦不至嘔
觸物感興得邵子吟自在詩之意今錄五章擊劍篇贈林
九元云赤手把長劍一擊生旋風熱血洒宇宙高情摩蒼
穹俛首眎斯世何地棲爾躬四顧少知己湖海聊自雄回
飈扶矯翼暫息婁水東招我明月下坐我春風中誰云新

相識而非夙所宗願借筆端鏘為我開鴻濛讀歸季思陶
菴集云夫子非今人今人非夫子野鶴立雞羣矯矯誰相
似當年元魯山僅得其眉宇醉中見淵明把臂稱知己人
品既高閒文章亦如此悠悠三十年生氣存故紙人處天
地間滄溟一漚耳于朝無所聞向夕何以死卓哉歸先生
高山我仰止朱俠侯鏡中園小飲云高閣憑虛入翠煙眼
中景物鏡中懸大蘇詞翰留餘地小米雲山落遠天杯酒
幸邀文字飲塵談初結喜歡緣君家自是鶯花主駘蕩春
光媚檻邊秋圃云日出行吟月出歸草長道狹露沾衣一
鉏獨荷出山去不帶人間是與非荷蓀行歌竹徑斜杖頭

秋色帶煙霞恠他何處山中月與我同居處士家又喜畫
梅求者輒與不吝又善鼓琴當困乏時則撫絃一操慰藉
妻子有別業在吳淞江西荒畦數畝茆屋三楹清池環之
橫木為渡常竟日不下遂自號西莊

論曰公晚年所至惟招提道院一杖孤往興盡則還或
偕溪翁山衲坐荒村枯冢間仰天歌呼自樂其樂塵中
人總不解其何謂也先族祖二泉徵君修邑志時朱孝
定請列之隱逸傳徵君從之蓋公與陶仁節交誼篤摯
仁節殉義後公忽忽數年以終而孝定為仁節之甥且
壻故知公最深焉

三
牙
仁

三





